

NO. SOALAN: 22

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

DARIPADA : TUAN WONG CHEN [KELANA JAYA]

TARIKH : 20 OKTOBER 2015

RUJUKAN : 8196

SOALAN:

Tuan Wong Chen [Kelana Jaya] minta **MENTERI DALAM NEGERI** menyatakan secara terperinci bilangan jenazah dan kubur-kubur besar pelarian Rohingya yang telah ditemui. Berapa ramaikah individu yang telah ditahan dan didakwa oleh Kementerian berkenaan dengan hal ini.

JAWAPAN:

Tuan Yang di-Pertua,

Penemuan khemah-khemah sementara yang dibina oleh sindiket-sindiket di dalam hutan di sempadan Malaysia dengan Thailand merupakan tempat yang diistilahkan sebagai “Safe Heaven” untuk memindahkan sementara pendatang-pendatang apabila pihak berkuasa Thailand membuat operasi di kawasan berkenaan, dan setelah kaedaan reda, pendatang berkenaan akan dipindah semula di penempatan kekal yang terletak di kawasan Thailand.

Pada 11 Mei 2015, pihak PDRM telah melancarkan Ops Wawasan Khas dengan menggerakkan pasukan VAT 69 dan anggota PGA bagi mengesan jika terdapat khemah dan kubur sebagaimana yang dijumpai oleh pihak Thailand. Hasil operasi tersebut, PDRM telah menemui 28 kesan dan tapak khemah pendatang asing tanpa izin dan sebanyak 139 struktur yang dipercayai kubur.

Pihak PDRM telah menghantar seramai 31 pegawai daripada Unit Forensik untuk menggali semula struktur yang dipercayai kubur dan setelah operasi menggali selesai pada 8 Jun 2015 telah menemui sejumlah 106 rangka mayat daripada 139 struktur kubur yang telah digali, selainnya kosong tanpa sebarang objek dijumpai. Kesemua rangka mayat yang dijumpai dan telah dihantar ke Hospital Sultanah Bahiyah, Alor Setar untuk proses

Post Mortem dan mendapati tiada unsur-unsur jenayah dan dipercayai kematian berpunca daripada penyakit dan kekurangan makanan. Sehingga kini, 99 rangka mayat telah dikebumikan dalam 4 peringkat bermula 22 Jun 2015 hingga 27 Julai 2015 di Tanah Perkuburan Islam Kg. Tualang, Mukim Tualang, Pokok Sena, Alor Setar, Kedah. Baki 7 mayat masih belum dikebumikan dan berada di Unit Patologi, Hospital Sultanah Bahiyah, Alor Setar, Kedah kerana menunggu laporan **Post Mortem**.

Pada 15 Ogos 2015 di belakang Taman Negeri Perlis, Wang Kelian, Padang Besar, pihak VAT 69 telah menjumpai satu lagi kem penempatan, 20 kubur dan 4 rangka manusia. Kedudukan kem ini terletak lebih kurang 800 meter di puncak Bukit Wang Kelian dengan jarak lebih kurang 200 meter dari sempadan Malaysia-Thailand.

Pada 22 Ogos 2015, proses penggalian kubur telah dijalankan. Sebanyak 24 rangka mayat telah dibawa turun dari lokasi dan dibawa ke Unit Patologi, Hospital Sultanah Bahiyah, Alor Setar, Kedah untuk dijalankan **Post Mortem**. Sebanyak 20 rangka telah dikebumikan pada 8 September 2015 dan baki 4 rangka masih belum dikebumikan kerana menunggu laporan **Post Mortem**.

Secara keseluruhannya, daripada dua operasi wawasan khas yang dijalankan, jumlah keseluruhan kem yang ditemui setakat ini adalah 29 kem penempatan dan 159 struktur dipercayai kubur

telah ditemui di Wang Kelian, Padang Besar, Perlis. Daripada 159 struktur kubur, sebanyak 125 rangka mayat telah ditemui di dalam kubur manakala 5 rangka mayat ditemui di luar kubur. Jumlah keseluruhan rangka mayat yang berjaya ditemui berjumlah 130 rangka. Dari jumlah tersebut sejumlah 119 rangka mayat telah dilaksanakan *post mortem* dan telah dikebumikan semula dan manakala baki 11 rangka mayat masih berada di hospital untuk menunggu laporan *post mortem* sebelum dikebumikan.

Dalam siasatan yang dijalankan PDRM juga telah berjaya menangkap sindiket yang terdiri daripada ejen, tekong atau transporter yang melibatkan warganegara Malaysia dan warganegara asing seramai 43 orang. Pihak polis juga telah menangkap 4 orang anggota polis yang disyaki terlibat atau bersekongkol dengan sindiket penyeludupan migran di bawah Akta ATIPSOM dan POCA.